



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7 Yangia anidakangma : Tir Yimiyim tiryimiyim@aolima tir yimiyim TAPAK 8

Hamasi ahangba Israel-i magizüksü: PM Netanyahu

Swiatek-i Madrid Open final nung Sabalenka kokogo



VOL. XXI ISSUE NO. 203 (ADOK 203) DIMAPUR TENTONÜ (MONDAY) MONUPII (MAY) 06, 2024 ₹ 5.00

Manipur: Thoubal nung nisung 30 tepsetba ken o talangka metembangteter

Imphal, Monupii/May 05 (Agencies): Manipur kübok Thoubal district nung nisung 30 shi tepsetba ken o bushisüngdangba kum 10 nungi 30 tashi liaka tatem kati maruteter, ta Manipur Human Rights Commission (MHRC) ajanga ashi.

Iba dak sendakba nung MHRC chairperson, Justice Utpalendu Bikash Saha (retd) ajanga nungdakba police keddangsurtem dangi osang agütsüba nung item ken o ochishia tekeraba nung benettsü ajungshia liasü.

Tawa Justice Saha-i anir ajungbena Thoubal police station aser Thoubal women police station sema aoba mapang item nisung tepsetba ken o tatem kati marui aliba indang temai adoka liasü.

Item ken o bushisüngdangba nung mapang kanga atsulangba atema temulung masüba aser jashiba Manipur Human Rights Commission (MHRC)

chairperson Justice Utpalendu Bikash Saha-i lemsatepa liasü.

Iba amala ken o bushisüngdangba nung menuba ajanga asür kinunger aser tai tonglokja alirtem takum nung kanga mejungi kongshir aser timtem balala ajurur, ta pai ashi.

Deputy Inspector General of Police (Range-II), Superintendent of Police, Thoubal, aser Officer-in-Charge of Thoubal Police Station nungertem dang tekeraba nung iba ken o benettsü Justice Saha-i tezüluba nung agüja liasü.

Mapang shidak nung ochi obendang angutsü senso ajak temeden lir, aser iba ken o tang tashi tatem kati maruteti menudaktsüba ya magizükter, ta MHRC ajanga ashi.

MHRC ajangasa Manipur Home Commissioner aser Director General of Police (DGP) dang parnoki anir iba bushisüngdang maparen tekeratiba nung tembangtsü ayongzüka liasü.

Manipur nung yipru tesashi ait, Assam nung nisung ana asü



Manipur nung Deobar nikongdang tzunglu tesashi den yipru aruba ajanga süngdong kati Autorickshaw raksatsüba noksa nung angur

Guwahati, Monupii/May 05 (TYO): Manipur nung Deobar nikongdang 1:30 ako meta tzunglu tesashi den cyclonic hailstorm arua teraksatsüba balala ajurua liasü.

Iba yipru ya minute 15 shi aita liasü aser iba mapang Imphal valley nung ki kar raksatsü aser süngdong kar tera mükepa laodakja liasü. Rür ya kanga sashia tsüka Imphal valley nung rür ya inch 4-5 shi liasü.

Imphal yimti nunga lenmang kar tzü agi mubang aser süngdong laoa auto rickshaw ka raksaja liasü.

Rür tsükba ajanga yimtung nung ozü tasü ishila liasü. Manipur Chief Minister N Biren Singh-ia social media sapangtem nung "Urgent Assistance Alert" agüja district shia indang helpline number agüja liasü.

"Manipur tesem balala nung tang hailstorm tesashi aruba mechi, nungdakba pur nem tekeratiba nung teyari agütsütsü.

Teyari agütsütsü atema district balala nung helpline number tem amenoka lir," ta CM Singh-i ashi.

"Nenok kumzüka ayutsü onük asoshi tongtipangtiba mapa lir. Imlibilema menungnangi teyari meshiang. Timtem mapang nenok yaritsü onok lir," ta Manipur Chief Minister-isa ashi.

Kasa mapang Assam nunga tzunglu kanga sashia aruba den yipru aitba osang liasü, aser BARPETA nunga tsüngi ajanga tetsü aser jala yasete liasü.

Tena ya arishi kum 60 tain Momiron Nessa aser lar jala arishi kum 20 tain Joshna Khatun ta jangjaogo.

Tena ya BARPETA kübok Saorachara yimdak par ki kima mena lia tsüngi ai ta ashir.

Iba lendong nung arishi kum 11 tain Iqbal Hussain yiru aser tang BARPETA Civil Hospital nung temang anepaluba mapang lir.

Tetsü aser jala ya arsanga anasa aliba mozüki bushia bener ao saka takum mekumzüktet.

PM Modi-i Varanasi Lok Sabha menden nung tokteptsü



Ato Kilonser Narendra Modi

Varanasi, Monupii/May 05 (Agencies): Ato Kilonser Narendra Modi-i Varanasi Lok Sabha menden nungi May 14 nü nomination papers agütsütsü, ta iba yimti nung BJP tir Vidyasagar Rai-i Deobarnü ashi.

Nomination agütsütsü anogo ka lia Modi-i iba constituency nung May 13 nü roadshow ka ayongzütsü. Iba roadshow atema renemshi tenzüko, ta Rai-i ashi.

"Iba roadshow atema lenmang lemtetogo. May 14 nü Ato Kilonser Modi-i Varanasi seat nungi pa indang nomination file asütsü," ta pai ashi.

Modi den tokteptsü atema Congress telokia Uttar Pradesh nung par telok nungi tekolakba Ajay Rai shima lir aser BSP nungi Athar Jamal Lari lir. Varanasi nung elections ya June 1 nü agütsü,

koba takum Lok Sabha elections phase tatembangba alitsü.

2019 elections nung PM Modi-i vote 674,664 (shilem 63.62) angu aser SP nungi Shalini Yadav-i vote 195,159 (shilem 18.40) ngua liasü. Congress nungi Ajay Rai-i jenjang tasembuba nung vote 152,548 (shilem 14.38) nguteta liasü.

Maneni Lok Sabha elections indang phase tasembuba atema nübuyimba tanü tembanger aser May 7 nü state 12 nungi constituency 94 nung vote agütsütsü. Karnataka nung tanüngba constituency 14 aser Gujarat nung constituency ajak (26) atema election tan round nung agütsü. Kasa phase nung Assam, Bihar, Madhya Pradesh, West Bengal aser Uttar Pradesh state tem nunga menden kar atema vote agütsütsü.

Party balala nungi yimten yimsüsürtem Deobarnü kanga mazüngi nübuyima liasü. Ato Kilonser Modi ya tanü Uttar Pradesh kübok Etawah nung pubic rally ka nung jembi aser ano Sitapur nunga shilem agiba sülen Ayodhya nung roadshow ka nung shilem agütsü.

Union Minister Amit Shah aser Rajnath Singh nung Andhra Pradesh nung nübuyima jajar aser Congress lenir Rahul Gandhi Telangana nung lir.

Pa teyi aser Congress general secretary Priyanka Gandhi ya Rae Bareli aser Amethi nung nübuyim sentong nung shilem agir.

West Bengal Chief Minister aser TMC tetsüti Mamata Banerjee ya Bardhaman, Durgapur, Birbhum aser Bolpur tesemtem nung rally balala ayongzüka liasü. Yimten yimsüsür tejen Sharad Pawar ya par jala Supriya Sule yaritsü atema Baramati nung lir.

Kasa mapang Defence Minister Rajnath Singh-i National Democratic Alliance (NDA) ajanga Lok Sabha menden 400 dak tema nung takok angutsü temulung lemteta lir ta maneni ashi.

Paisa BJP sorkari Constitution kodanga memelenshitsu mesüra reservation magientsü ta ashi aser Congress-i nüburtem tsübodakja "vote bank" politics atema osang tiazü prokshir ta aitsü.

SP, Congress ajanga pei kibong ajangzüksü atema dang inyaker: PM Modi

Etawah, Monupii/May 05 (Agencies): Deobarnü Ato Kilonser Narendra Modi-i Samajwadi Party aser Congress anema jembidang, parnoki elections ya pei kibong aser vote banks tajangzüc atema tokteper, ta ashi.

Samajwadi Party (SP) kumtetsang asür Mulayam Singh Yadav'er constituency, Etawah nung Lok Sabha election nübuyim sentong ka nung jembidang, Yadav-i 2019 kum Parliament nung jembiba

bilemteta ashi, kong asür Yadav-i Modi ya ano ato kilonser akumtsü ta shia liasü.

"Ibai pa indang temoatsü liasü," ta Modi-i ashi.

SP aser Congress indang yimiyim ya tiazü dang lir aser par nükjidong ya majung, ta ato kilonseri ashi.

SP aser Congress ya opposition INDIA bloc nung züngsem lir aser Uttar Pradesh nung allies ama tokteper.

"Samajwadi Party aser Congress ya par tarutsü aser

parnok chirnurtem atema elections nung tokteper. Parnoki parnok kibong aser parnok vote banks ajangzüksü atema dang inyaker," ta Modi-i aitsü.

COVID-19 vaccines dak sendakba nunga pai Samajwadi Party aitsü aser par lenirtem iba vaccine anema nokdaktetsü nüburtem ajungmeso aser parnoka miima mozü ya agi ta ashi.

"Modi aser Yogi ya ner tanurtem tarutsü asoshi inyaker... onokbo tanur mali," ta Modi-isa ashi.

Wholesale warehouses, bonded warehouses, IMFL retail ON and OFF doka, microbreweries aser country spirit shops ajak iba mapang shibanga alitsü, ta State Election Commission ajanga tuyu.

Election maparen tajungtiba nung agia tembangtsü mechi iba mera ya agir.

Vote ya June 4 nü azüngtsü lir. Assam nung 2019 kum Lok Sabha elections nung menden 14 nungi BJP-i menden 9, Congress-i menden asem aser AIUDF-i menden ka nung takok ngua liasü.

State Election Commission ajanga sangdong ka nung ashiba agi, May 5 nikongdang 5:00 ako nungi May 7 nü polling matem tashi Guwahati, BARPETA, Dhubri aser Kokrajhar (ST) constituency tem nung yi mayoktsü.

Assam nung Lok Sabha elections phase 3 atema nübuyim temogo

Guwahati, Monupii/May 05 (Agencies): Assam nung Lok Sabha election atema phase tasembuba nübuyim tanü (May 5) nikongdang 5:00 ako nung tembangogo. May 7 nü Lok Sabha elections 2024 indang phase tasembuba nung Assam nungi constituency pezü - Guwahati, BARPETA, Dhubri aser Kokrajhar (ST) nung vote agütsütsü.

Phase tasembuba nung Assam kübok constituency pezü nungi candidates 47 tokteper.

Nübuyim tembangba den külemi ghonda 48 silence period

Wholesale warehouses, bonded warehouses, IMFL retail ON and OFF doka, microbreweries aser country spirit shops ajak iba mapang shibanga alitsü, ta State Election Commission ajanga tuyu.

Election maparen tajungtiba nung agia tembangtsü mechi iba mera ya agir.

Vote ya June 4 nü azüngtsü lir. Assam nung 2019 kum Lok Sabha elections nung menden 14 nungi BJP-i menden 9, Congress-i menden asem aser AIUDF-i menden ka nung takok ngua liasü.



Diphupar Ao Baptist Arogo nung May 05, 2024 amongnü temoatsü sentep nung Sobaliba sentong ka ayongzüka agiba mapang akhi tsüraburtemi amshia aruba osettem bendena yur süngo jema reprangdaksüba mapang agiba noksa kar yangi angur. Iba sentong nung " Sobaliba samara, iba kinji samalanglang" ta asüba onük nung Tir Yimyim Yimozülur K.Temjen Jamiri jembia liasü. Kasa sentong nung lanurtem, Arogo tenzükertem aser tebutedi tajungtemi sobaliba dak aketna shilem balala agia liasü. Diphupar arogo nung küm shia Moatsü mesüra Tsüngremmung mapang amongnü ka shiteta Sobaliba sentong ya agir.

Poppy ayimtsü atema Manipur nung arem sq km 877 raksaogo: CM

Imphal, Monupii/May 5 (Agencies): 1987 nungi 2021 küm tashi nung küm 34 tsüingda Manipur nung arem square kilometers 877 raksaogo. Iba osang ya Manipur chief minister N Biren Singh-i Manipur nung 1987 nungi 2021 küm tashi nung arem indang data ka lemsatepba mapang metetdaksü. Manipur CM N Biren Singh-i ashiba agi, 1987 küm state nung arem sq km 17,475 liasü saka 2021 kümbo 16,598 dang kümogo. Manipur chief minister-i, arem tajemba küma aoba ya küm 34 tsüingda state nung poppy alu ayimba dak tai tongloktüsügo. "Arem square kilometer 877 samaogo aser iba ya poppy alu ayimba ajanga lir," ta Manipur CM N Biren Singh-i ashi.

Ajisüaka Bharatiya Janata Party (BJP)-i 2017 küm Manipur nung sorkar kümtebba sülen state sorkari arem atsüing alir nisung 291 aninogo, ta metetdaksü. "Mekazüka aliba arem nungi ali atsünger alirtem aninba sentong state ajunga nung benoka inyakogo," ta Manipur CM N Biren Singh-i ashi. Maneni pai, Manipur sorkari ali atsünga alirtem mintokba ya kin ka mesüra lokti ka dak rangloker inyaka maru, ta jangjashitsü. Taoba mapang Manipur chief minister N Biren Singh-i, state nung ozüing alema arua alirtemi yimtsüing tasen 996 amenokba indang süoki ia bilemba lemsatepa liasü. Paisa, ozüing alema state-i bendangertem aruba ajanga state nung yimtsüing tasen aika

pokteter aser iba ya lisopurtem aser national security atema amokmeren ka lir, ta ashi. Manipur chief minister-i, yimtsüing tasen aser nütsüingyongsük merenloktüsü yimya nung renloka aoba ya agizüktüsü akoktsü asü, ta asüingdang. Ozüing alema bendangertem senoka aiba ajanga state mesüra linük demography melenshir, ta Singh-i ashi. Pai ashiba agi, Manipur lendong nung lir, kong 2006 küm nungi tanü tashi Manipur nungi ozüing alema bendangertem aika senoka aitba ajanga yimtsüing aika poktetogo. Ozüing alema arurtemi yimtsüing tasen amenokba aser parnokki poppy alu ayimba ajanga arem raksar, ta CM Biren Singh-i ashi.

YR&S-i Kezo nung Prefab Multipurpose Hall asadang



Dimapur, Monupii/May 5 (TYO): Youth Resources & Sports Department aser Kezoma Urban Station Committee ketdangsürtemi tang Kezo jila nung yanglua aliba Prefab Multipurpose Hall semdangogo. Iba team ya Director Kethosituo Sekhose, NCS-i anir ao, kong Joint Director Teisobu Sekhose, DSO Kohima Zhopovi Zecho, Executive Engineer Er.Swedi Kiso, Junior Engineer Er. Denben Yanthan nunger densema liasü. Kezoma Urban Station tenüing nung Chairman Mhasivi Naki, Vice Chairman Zadekhweto, aser Chairman Kezoma Village Council Kikrosa Naki nungeri shilem agia liasü. Temetetsü kaji CM Neiphui Rio-i 2022 küm October 28 nü Kezoma Urban Station semzüktüsüba mapang, lokti senden aser sentong balala agitsü aser kasa mapang nung indoor sports stadium ama amshitsü atema Multipurpose hall ka yanglutsü asoshi senotsü agütsüba sangdonga liasü. Kezoma Urban Station kübok Kezoma, Kezo Basa, Kezo jila aser Sakhabama lir. Kezoma Urban Station-i Chief Minister nem tenüingsang agütsüba den multipurpose hall yangluba nükjidong tongtetsü atema teyari agütsütsü tenangzüka agüja liasü. Kasa

mapang nung parnokisa ali tenlar Kikrosa Naki, Chairman Kezoma Village Council danga kanga pelaba lemsatepa liasü. Department-i ashiba agi, iba amala multipurpose hall ya state ajunga nung yangluyonga odar, kechiyong item amala hall yangluba nung sen aika mintoker aser yanglutsü atema mapang talangka magir. Iba stadium nung ki telung nung asayaba asayatem ajak training agitetsü aser asayamungtema ayongzüka asayatetsü aser iba den külemi lokti senden aser sentong balala agitsü atema amshitetsü. Tang tashi nung state sorkari stadium pongu lapoktsüogo aser taküm ano ishika lapoktsü sentong lir. Iba hall semdangba mapang RCC foundation aser pedestal column tem kanga junga yanglua aliba tesemdangertem asatetogo aser kasa mapang nung steel superstructure tem tang factory nung yangludat. RCC tongshi tongnütem yangluzükba sülen steel superstructure bener arua amenoktsü koba anogo ishika tsüingda renemtsü. Iba hall ya taküm küm tsüingda yangluzüktsü imlar. Kasa mapang nung Kezoma Urban Station-i, Department dang retaining wall aser kima menokbangtsütsü atema mepeshia asüingdang aser department-i iba ken o ya sorkar dangi abentsü tenangzüka agüja liasü.

Lok Sabha election: Kamrup district-i otsü tasen ka yangluogo

Guwahati, Monupii/May 5 (Agencies): Assam kübok Kamrup district, kong Guwahati aser Barpeta Lok Sabha constituency densema lir iba district nung Lok Sabha election May 7 nü agitsü aser iba election nung tetsürtemi polling stations 19 achaayangtsü, koba otsü tasen ka asütsü. District nung tetsürtem achaayangba polling station 19, lanurtem achaayangba polling station ka, model polling stations pezü aser Persons with Disabilities (PwD)-i achaayangba polling station ka densema lir, ta ketdangsürtemi ashi. District nung vote 8,38,493-i polling stations 965 nung vote agütsütsü kong voter tasen 14,887 densema lir. Polling stations 965 nungi Chamaria Assembly constituency nung polling stations 247 lir, Guwahati parliamentary constituency

kübok Boko-Chaygaon (232) aser Palashbari (262) lir aser Barpeta Lok Sabha constituency kübok Hajo-Sualkuchi Assembly constituency nung polling stations 224 lir. Kinük nung aiba polling station 16 atema polling ketdangsürtemi May 5 nü apusoago aser tanungba polling station 949 atema tanga ketdangsürtem Hombarnü apusotsü. Kamrup District Commissioner (DC) aser District Election Officer (DEO), Keerthi Jalli-i ashiba agi, election kecha tetsükdaksü makai agitsü atema tinyaktsü kechisa ali item ajakji anepalutsüogo. Election tetsükdaksü makai yimjung nung agitsü atema district administration-i polling ketdangsür 4,468 shimogo. Maneni temzüing ozüing dak sendakba nung kecha

tetsükdaksü madoktsü atema security yokogo. District administration-i voter tem dang polling station telungi mobile phone bener maitsü atema mepeshia metetdaksüogo. DC-isa, voter tem dang nikonngtsütsü ata-a makazüi anepdang yakta arua vote agütsütsü mepeshia metetdaksüogo. Temetetsü kaji tintetrogo 214 PwD voter 21-i home voting system ajanga vote agüjatokogo. District administration-isa, May 5 nü nikonngtsütsü 5 ako nungi May 7 nü nikonngtsütsü 5 ako tashi ghonda 48 "dry days" asütsü ta sangdongogo. Iba mapang Indian-made foreign liquor (IMFL), local yi aser temesepba chiyongtsü kecha mayoktsü. Maneni district administration-isa, June 4 nü vote azüingba anogo ya-a "dry day" asütsü ta sangdongogo.

J&K nung kiralongrartemi sepaitem amakba Assam CM-ia aitsü

Guwahati, Monupii/May 5 (Agencies): Linük nung party balala nungi lenirtem den külemi Assam chief minister Himanta Biswa Sarma-i, kiralongrartemi Honibarnü Jammu and Kashmir kübok Poonch amakba aitsüogo. Kiralongrartemi Poonch amakba sülen Indian Air Force

(IAF) personnel ka asü. Assam chief minister Himanta Biswa Sarma-i iba osang angashia pa kanga mepelaba lemsatep aser iba tasümaita mapa inyakertem temzüing ozüing dak ajemdaker obendangtsü, ta ashi. "Pooch nung IAF convoy ka kiralongrartemi maka Air Force personnel pezü tashi

yirutsüba ya ni aitsür," ta Assam CM Himanta Biswa Sarma-i ashi. Paisa, "yirur alirtem takaratiba nung taneptsü angutsü imlaja atar. Iba lendong bener arutsütem odangbo metoktsütsü aser temzüing ozüing dak ajemdaker merenshitsu," ta ashi. Honibarnü Pooch kübok

Sanai yimtsüing nung kiralongrartemi Air Force convoy ka maka sepaitem yirutsüba sülen yirur alirtem Udampur nung Command Hospital-i anir ao. Ajisüaka tia maka parnok rongnung ka temang anepalua aliba mapang süatok. Air Force convoy amakba sülen iba anasa aliba Rashtriya

Rifles unit kati iba tesem meketbang aser Army aser police-i teyari agüja convoy amakertem aputsü atema iba tesem meita oa liasü. Iba tatalokba jangjashija Indian Air Force (IAF)-i convoy tangbo tekümzüka kübok aliba aser bushisüingdang tenzüker aliba indang metetdaksü.



May 05, 2024 nü New Delhi nung Chief Election Commissioner Rajiv Kumar, Election Commissioner ana- Gyanesh Kumar aser Sukhbir Singh Sandhu den linük 23 nungi Election Management Bodies (EMB) nung züngsemtem tangokba noksa nung angur. India nunger election inyakym angazüksü atema Election Visitors' Programme of Election Commission of India (ECI) nung adentsü bendang linük balala nungi ketdangsertem aika arua lir.

OFFICE OF THE
FOREST & RAW MATERIALS CONTRACTORS ASSOCIATION TULI
Dist. Mokokchung : Nagaland. Pin - 798618
Regd. No. LBR - 20/85.

Forest & Raw Materials Contractors Association Tuli 41 buba lokti senden **May 10, 2024 nü 10 ako** nungi tenzüka F&RMCA conference hall nung amentsü. Anungji iba senden nung züngsem ajak arua adentsü metetdaksür.

Sd/-
C Temjen
President

Sd/-
R. Molung Imsong
General secretary

MELENSHITSÜR

May 4th, 2024 anogo nung NSCN/GPRN. K (Niki) teloki paper nung adokja aliba Imlionen S/o Marlepzü, Kelingmen Village ta alibaji masü saka Imlionen ji S/o. Imtisüsü Yaden, Merangkong village lir ta melenshitsu.

Sd/-
Marlepzü
Kelingmen Village.

SC-i May 7 nü Kejriwal nem interim bail agütsüsü akok

New Delhi, Monupii/May 05 (Agencies): Tang Lok Sabha election tagidak mapang nung May 7 nü Supreme Court-i Delhi Chief Minister Arvind Kejriwal nem interim bail agütsüsü akok.

Delhi excise policy ken o dak sendakba nung taküm March 21 nü Enforcement Directorate-i AAP tongti lenir, Arvind Kejriwal pua liasü. Tang pa Tihar jail nung puoka lir.

Justices- Sanjiv Khanna aser Dipankar Datta nati akümba bench-i Enforcement Directorate (ED) dang, Kejriwal apuba anema pai temepishiba agütsüba ken otem angadangsü atema mapang talangka agütsü akok, anungji Delhi nung Lok Sabha election dak sendakba nung Kejriwal nem interim bail agütsüsü akok ta shiogo, ta osang ka ajanga metetdaksü.

Delhi nung Lok Sabha menden tenet atema May 25 nü election agütsü.

Supreme Court bench-i ED atema ken o jembitsür Additional Solicitor General, SV Raju dang May 7 nü iba ken o angadangsü renema liang, ta metetdaksüogo.

Bench-i Raju dang "Tanü iba ken o metembangtsü ama bilemer. Onoki maneni Mongolbarnep angadangsü. Raju, ano langka shiner. Election lir, anungji mapang agütsüsa süra onoki interim bail atema shisadangsü," ta metetdaksü.

Raju-i pai Kejriwal indang bail anema nokdaksü, ta shiogo.

Bench-i, "May 7 nü interim bail atema temepishiba angadanga ajanga ED maoksatsü atema onoki court tebilemba jelia metetdakja atar," ta metetdaksü.

"Onoki telangzüba magütsür saka onoki interim bail temepishiba ken o angadangsü. Onoki interim bail agütsüsü ta mashir. Onoki interim bail agütsüsü akok mesüra

magütsüsü akok," ta bench-isa metetdaksü.

Ken o angadanga mapang Kejriwal atema ken o jembitsür senior advocate, Abhishek Singhvi-i bench dang, election agütsü osang March 16 nü sangdong aser yaküm July ita nungi ED ket nung aliba kulitem nung ajemdaker ED-i taküm March 21 nü ang Kejriwal apu, ta ashi.

Singhvi-isa Delhi nung Lok Sabha election atema nüboyim May 23 nü tembangtsü aser May 25 nü election agütsü, ta metetdaksü.

Singhvi-i, Kejriwal-i sübokrem agiba kuli mali aser kuli ali nunga iba ken o ya PMLA kübok masü saka Prevention of Corruption Act kübok aittsüla, ta ashi.

April 15-i court-i ED dang Kejriwal-i pa apuba anema temepishiba ken o agüja aliba dak sendakba nung telangzüba agüjang, ta tuyua liasü.

J&K kübok Poonch district nung kiralongrartemi IAF sepaitem amak

New Delhi, May 05 (Agencies): Honibar aonung Jammu & Kashmir kübok Poonch district nung kiralongrartemi Indian Air Force (IAF) sepaitem convoy amakba sülen kiralongrartem mita aodang nisung aika pua asüngdangyadar, ta Amongnü ketdangsertemi metetdaksü.

Jammu nung Additional Director General of Police, Anand Jain den Army aser intelligence agency balala nungi ketdangsertemi Poonch district kübok Surankote area nung sepaitem amakba tesemji semdangogo.

Army temia helicopter amshia iba tesem asadangogo.

Poonch nung kiralongrartemi sepaitem amakba sülen Indian Air Force-i tang tashi kiralongrartemi mita odar.

Honibar aonung kiralongrartemi amakdang IAF sepai, Vikky Pahade kanga mejungi yirua liasü aser

mekümzükteti Amongnü süogo.

Vikky Pahade asüba atema mangyima IAF-i X ajanga, "CAS Air Chief Marshal, VR Chaudhari aser Indian Air Force nung sepai ajaki linük tenzüka mapang Poonch nung taküm bendanga agütsür tasütait Corporal Vikky Pahade nem akhüm agütsür. Onoki par kibong den mangyim jashi lemsateper. Iba ama mapang ka nung onoki nenok den tejashi lemsateper," ta metetdaksü.

Kasa tatalokba nungji IAF sepai pongu yirua liasü.

Police aser Army senteper Shashtar, Gursai, Sanai aser Sheendara nung kiralongrartemi mita odar aser Army Para Commando sepaitemia shilem agidar.

Tang tashi nungbo kiralongrar shinga mapu saka iba tatalokba dak sendakba nung nisung aika pua asüngdangyadar, ta ketdangsertemi metetdaksü.

Lok Sabha MP Prajwal Revanna anema blue corner notice agütsüogo

New Delhi, May 05 (Agencies): Tetsür aika dak tim mesüi beshiba ken o dak sendakba nung Amongnü Lok Sabha MP, Prajwal Revanna anema blue-corner notice agütsüogo, ta Karnataka home minister, G Parameshwara-i metetdaksü.

Paisa, Prajwal Revanna India-i anir arutsü atema Interpol teyari agir, ta metetdaksü.

"Inyakym nung ajemdaker SIT-i inyakdar. Ni iba dak alia

osang kecha magütsütettsü, aser ni osang ajakbo memetet," ta pai metetdaksü.

"Iba ken o ya tulu asüba agi onoki SIT tentet aser ochi obendang agütsüsü atema onoki parnok nem tashi ajak agütsüogo," ta Parameshwara-i metetdaksü.

Kasa ken o dak sendakba nung Honibarnü Special Investigation Team (SIT)-i Prajwal Revanna tebu, HD Revanna puogo.

Honibarnü nikongdang pa

(HD Revanna) Bowring Medical Institute-i anir oa medical check-up agiogo.

Tetsürtem dak tim mesüi beshiba atema HD Revanna aser Prajwal Revanna na anema aken o benokba sülen Brihostibar aonunga HD Revanna aser pa den külemi inyaksemer, Sathish Babanna na anema ken o tasen ka benokogo. Tetsür ka puer aoba dak sendakba nung Mysuru nung HD Revanna aser Babanna na anema ken o benok.

BJP-i linük temzüng kodanga memelentsü: Rajnath Singh

New Delhi, May 05 (Agencies): BJP sorkari linük temzüng kodanga memelentsü mesüra reservation magütsü, ta Amongnü Defence Minister Rajnath Singh-i metetdaksü.

Paisa, Congress party-i nüburtem tsübudaktsüsü meranger, aser vote bank atema parnoki osang tai proker, ta aitsü.

Interview ka nung jembidang Rajnath Singh-i, "Congress-i linük temzüng 80 ben yanglushiogo. Parnoki Emergency mapang nung linük temzüng nung okila melenshia liasü," ta ashi.

"BJP-i linük temzüng kodanga memelentsü. Linük temzüng yanglurtemi linük temzüng okila kodanga memelentsü, ta bilema maliasü. Nenoki (Congress) linük temzüng tangatetba yirutsüsü atema dang inyak," ta pai ashi.

"Linük temzüng okila memelentsü. Parnoki melenshi aser tangbo parnoki onok anema tiyazü nung tai tongloksür," ta paisa metetdaksü.

India linük temzüng okila nung temzüng tangatetbatem metetdakja lir. 1976 küm 42buba Amendment nung India teratet "sovereign democratic republic" ta aliba nungi

"sovereign socialist secular democratic republic" ta melenshia liasü.

"Parnoki (Congress) sensotem melungjang nung tetsübu inokja nüburtem teyari agütsü meranger," ta Rajnath Singh-i ashi.

"Ni ashitsü agibo, nenoki tsübudakja masü saka melung lemdakja nüburtem teyari agütsü merangtsüla. Ochi nung ajemdaker election atema nüboyimtsüla," ta pai ashi.

Hokolbarnü Rahul Gandhi-i Ato kilonser Narendra Modi, BJP aser RSS-i India democracy anema maneni inyaker aser linük temzüng raksatsüner, ta aija liasü.

Reservation dak sendakba nung Congress-i tiyazü jembir, ta shia Rajnath-i, "Congress-i nüburtem dang yazü jembir. Reservation magütsü. Parnoki onok anema tiyazü nung tai tongloksür," ta metetdaksü.



May 05, 2024 nü Gurugram, Haryana nung actor aser Gurugram constituency nungi Congress candidate, Raj Babbar-i election nüboyim sentong ka nung shilem agidang tangokba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, MAY (MONUPII) 06, 2024

Tsüngrem metsüburtem

Kinunger yimtak tenla ki dena rongdoktsütsü merangba mapaji asenok ajak atema teshisangdangtsü mapa ka lir. Aji Kinunger yimertem asoshi dang masü, asenok Aor tamangertem ajak asoshi, asenoki mereprangteter dang ashi, jara nung langka tekümdangtsü ka zülua sayur asütsü. Ibaji tenla kiji yanglushi agi ajungtsüba mapa ka masü saka asenok tamangertem tamang jenjang khen reprangshidaktsüner asü ta angateter. Joko, asenok amanga-amanga Tsüngrem tali tali tsüba amangtsü melen Tsüngrem metsübuba-metsübuba ta amangteter. Ashiko, aji Tsüngremi asenok tali meimba agi asenok angaoka aoer asütsüa akok. Aji oda, kidang tsüraburtemi taginüba ajak agüja tali meimba agi tanurtemi pei tsürabur nüken metsübu akümba ama, asenoka Tsüngrem den külemi lia lia Tsüngremang asen sülen anidaktsüsa asenoki amangtet südi. Nütsüng nübortemi amangba tamang jenjangbo yutsür, talisa asenok Ao arogortem tamangba jenjang reprangdangra, asenok toklang tenzükertem tamang jenjangsa teladakba angur. Akhidang, theology azünger maliba mapang anarongdena Bible school nung zünger Tsüngrem tenzükba o tanü theology akoshia zünger Tsüngrem tenzükba na tsüngda tanüla khuret bena tenzükba nung tetsüngda kanga talanga ittepba lir. Aji oda, tanübo arogo nung Laishiba nung aliba Tsüngrem o tem rateta ashir agi kanga anünger. Ashiko, aji asenoki Bible masü theology dang azüngba agi alitsü. Joko, amanga amanga aniadok ama, tamangertemi sentepi mouner aser tenzükertemia sentep maginer ta sentep ki sen aika endoka yanglua malang küma odagi. Akhidang, revival mapang tenla ki sülok aser aonung shia sentep kidang mesemi Tsüngrem külemtsü sentep, joko iba tejangraba to kenyongi mali kümogo. Aji oda, sentepibo arutsü ajungshir saka Tsüngrem o jungjunga bushir renema magütsüteter ta timtemba mapang ka nung asenoki Tsüngrem metsübur, anungji tangaria asen akhüm metsübur ta asenok Khristan mesük memesük ka jenjang nung asen mapang aser rongsen arogo aika nung endokdagi. Aji oda, government office nung dang masü saka Arogotem Mission Center aser arogo nung senotsü ochimashi amshiba indang mapang mapang shia angashidang, Tsüngrema jashia alitsü aser nütsüng nübortem mulung yirur. Joko, asen lima asentenshi mapanga Tsüngrem nungi aruba osang tongdartemi nütsüng nübortemang masü saka toklang tenzükertem aser reverend-temang ochimashiba lenmang nungi temulung meyiptsü indang ashir. Itemji kodang sarasadema bilemdangdir, atangji, tanü asenok arogotem nung toklang tenzükertem dak tanela temeshi milak ali nung dang nütsüng nebortem meyong tanela milentemji tsükloktsüyonga aotsü. Shiba südir süang, tenla ki tashi rongdoktsütsü metsübu aser marendaki bilembaji zübazübaa bilemer yutsütsüba mapa ka masü saka joko asenok mungdang aser arogo tashi nung Yisu Khrista yimsü anemer aitadokogo ta sayur. Asenoki Khristan anemertemji tanga tamangba yimsü amanger, tangar kin aser tangar nisung asütsü amai bilemer saka shitakba Khristan yimsü anemertemji arogo nung tenüng ka agi tenzükertem aser arogo nung tenüng agi amangba purtem asütsü. Asenoki Tsüngrem dak junga mamangtetba aser junga metenzükertba temenen tulu ana lir, kaji Tsüngrem dang nungi alima rongsen temeimba, anungji takar dang kümdi süra Laishiba zünga sarasademer ayatsü aser temenen tangabaji, asenok azümasen. Asenoki Laishibaa mazünger, kibok sema sarasadema jajatsüa mejangrar, sen tera anguba agi chiyongli mejangli ta kazüba agi nia tanela masü temangang kanga yiraogo. Tang asen lima aser Tsüngrem asoshi nungdakji, kü temang ajemdaktsüsüla aser kü nela yiradaktsüsüla.

OLEMSABANG

Tanü asen Naga nunger nuburtem küküa asükdemer

~ L. Kika Pongener.

Tawa anogo ishika Confederation of Nagaland Chamber of Commerce and Industry (CNCCI) aser Dimapur Chamber of Commerce and Industry (DCCI)-i anir mulongtet telok (NGO) aikati shilem agia, Dimapur jila nungi tenzükertem, Naga lima ajunga nung jila tulu aika nung shishilempaba tesem (Business Establishment) ajunga shibangba mapang, asen Naga nunger nuburtem Nagaland arrtsü (Border) anasa aliba Assam limai lua shishilempaba agi, ano meyiper Assam nunger shishilempartem-ang kanga ajangzükdaktsüogo. April 29th anogo nung Ghonda ishika 12:00 a.m. nungi 6:00 p.m. tashi lapokba mapang nuburtem tesungmangtsüka nungtepa shishiba-to angudang, COVID-19 agi Lookdown asüandang, nungtepa shishiba-to dang nuklai arua bilemteta kanga temulong shiranga bilemogo. Tanü asen Naga nunger nuburtem iba amai nunga, asükdema, jepa, timtema, tokrong jenjang nung aliba ya kechi ka atema tim-ademer akaaa...!!!??? ta aiben shisadanga bilemdanger. Ajiser, iba timtem tia nung liaka, kechi ajanga tim-ademer'ar shinga-ia odi-odia meshiteter, kechiyong nuburtemi ochi o jembitsü tsübur...!!! Kechiyong shirnoki tasü-ita ochi o jembir parnok-jibo pei taküma kechi ka ataloktsü'ar 'Dekhana' maliba jenjang ka nung tanü asenok alir.

Asenoki India nunger nungi nujiso bushir, saka asen atepzüng nungpo pei nubur tsüngda nung nujiso maka, nuburtem asükdema, timtem tokrong jenjang nung lir. Aji oda, nujiso dak sendakba maparen agi asen lima iba ama timtem-ang talila bendenloker...!!! ta sasa-a bilemer. Joko asen Naga nunger sensaker kibongtemi balaka timtem maremer. Tanü asen lima nung osettsüset nung jenjang hopta shia aser ita shia amai atur. Küsa osettsüset ka Assam nung Lahorjan, Khatkhuti, Bokajan jila nung Rs.5000/- agi aliba (Purchased) Dimapur nungpo Rs.8000/- agi alir, Rs.15,000/- agi aliba Dimapur nungpo Rs.18,000/- agi alir. Surabangla, Naga lima tanga jila nungpo kwika talila tur alitsü...??? Taküm küm tsüngda nung danga Ak shi seret nung asemben atong-atonga sen jenjang tuogo. Jila ajunga Gate nung telok-tentet balalai oset apenba 'Mal Gari' ajak dang Tax meshir, ibajagi osettsüset nung jenjang tujen atur aser ibajagi nubur dak kongshir. Business Establishment aser Dokan ajak nung tax meshir, iba tax-ji osettsüset jenjang nung inoker meshir ibajagi nubur dak kongshir. Contractor & Supplier dang percentage (%) meshir, ibajagi terenlok mapa shitak/junga meinyakteter. Joko nuburtemi India nunger nungi nujiso aginuba dang nungibo, saru-saji saruba nungi nujiso aginuba tuluba kümogo. Terasatsüka, asen Naga nunger nujiso 'Solution' ya yakta arutsü yimlaseta alinung, meyiper nujiso bushir linuk tenzükertem-ang telok tali-tali tenzükba aoba ngua kanga dang sasa-a bilemer.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Archaeologist temi Dawid yimti nung Laishiba nung shia aliba kuli angu



May 05, 2024: Archaeologist temi akhidang Jerusalem nung aliba tesem ka nung Laishiba nung shia aliba kuli kar ngutetogo.

Archaeologist temi akhidang Dawid yimti nung jara ka study südar aser iba tesemji akhidang Jerusalem jila tentetba tesem lir ta bilemer.

Tamalenbo iba jaraji Judah chuba, Hezekiah-i tsükchirtem nungi kümzüksü atema yangluba jara liasü, ta bilema liasü.

Hezekiah ya 715BC aser 686BC tsüngda liasü.

Ajisüaka Israel Antiquities Authority (IAA) indang research tasen ka ajanga, iba jaraji Hezekiah tebuo tebu, Uziah-i yanglu ta bushitetogo, aser ibaji Tejen Lai nung shia aliba ama lir.

IAA nungi Joe Uziel-i, "Iba jara ya Judah chuba Hezekiah-i yanglu, ta tesüiba küm aika amanga aruogo, ajisüaka iba ya Laishiba nung shia aliba ama Uziah chuba mapang nung liasü ta bushitetogo," ta metetdaksü.

"Tang tashi nungbo research agir aikati iba jara ya Assyria chuba, Sennacherib anema

apusodang Yirusalem kümzüksü atema Hezekiah chubai yangluba liasü ta amanga liasü, ajisüaka tangbo anüdoklen tsütsü jaraji David yimti kübok liasü aser iba dang nungjagi tamaba mapang ka nung aser Yirusalem nung menoknok tulu anokba sülen yanglu aser yimti dak sendakba kiojen liasü, ta bushitetogo," ta Joe Uziel-i metetdaksü.

Iba jara yangluba indang ya Tejen Lai nung Putipuyang tanabuba kaket nung zülua lir. Iba Lai nungji yamai zülua lir, "Uzziah-i Jerusalem kübok Corner Gate nung aliba Valley Gate aser jara tatembanglen mitsa yanglu."

Laishiba nungsa Amos kaket nung menoknok indang shia lir aser menoknok anokbaji Judah nung Uziah chuba mapang nung liasü.

Research agirtemi 'radiocarbon dating' amshia mapangji asadang. Parnoki radioactive isotope of carbon (14C) amshia carbon keta aliba osettem asadanga mapang asadang.

David yimti nung aliba excavation tesem balala pezü nungi tsükmenatsü tejang,

'dates' tejang aser laah teret aika amshia radiocarbon asadang.

Iba sülen research agirtemi 'particle accelerator' amshia laah teret aser süngjangji carbon-14 den bendanga liasü. Carbon asadanga ajanga parnoki mapangji asadanteta liasü.

IAA-i Tel Aviv University aser Rehovot nung aliba Weizmann Institute of Science den longjemer iba research agi aser parnoki bushitetbaji National Academy of Sciences of the United States of America (PNAS) nung adokja liasü.

Tel Aviv University nung professor Yuval Gadot-i, "Tang tashi nungbo research agir teimbakati Yirusalem renokbaji anüolen den sendaktepja liasü aser küm 2,700 tejaklen Hezekiah chuba mapang nung liasü ta amanga liasü," ta metetdaksü.

Dr Uziel-i, tawa bushitetbatemji ajanga David yimtiji David aser Solomon nunger yimsüsüba mapang asenoki bilema aliba dang nungi kanga tuluba liasü ta jangjar, ta metetdaksü.

Arogotemi Sudan linük nung yimjung atema inyaksü ayongzüker

May 04, 2024: Church of England aser Catholic Arogoi külem sangdong ka ajanga tang Sudan linük nung rara atema tebilemsü katsüba lemsatepba den külemi alima linüktem dang iba linük nung yimjung atema inyaksü ayongzüker.

Sudan nung Rapid Support Forces (RSF) aser Sudanese Armed Forces (SAF) sepaitem tsüngda rara tenzüka sülen küm ka abensaba mapang nung Arogotemi iba tayongzüka agütsü.

UN-i, Sudan nung nisung 15,000 jungnüa tepsetogo aser nisung million 25 dak temai teyari balala nungdaker, ta metetdaksüogo.

World Food Programme-ia Sudan nung nisung million 10.5

tesem balala nung jenshia lir, ta metetdaksü.

Church of England nung Foreign Affairs tongti, Nick Baines aser Catholic Bishops' Conference of England & Wales kübok Africa atema tongti putir, Paul Swarbrick nati 'civil war ya tamadokba rara ka lir aser iba rara nung takoker mali. Iba ya asen mapang nung meimchirtemi ajangshiba timtem tulutibatem rongnung ka lir,' ta metetdaksü.

Parnokisa, alimai Ukraine aser Gaza na nung rara dak dang ranglokba ajanga Sudan nung rarabo sendoker; Sudan nung rara ajanga tetsür-tanurtem tamajungba timtemer, ta metetdaksü.

Parnokisa, "2020 küm Easter onük jembidang Pope

Francis-i asenok dang tang mapang ya amataritsü mapang ka masü ta shiogo, iba denji külemi Archbishop of Canterbury-ia rara ajanga timtemertem yaritsü ayongzüker," ta metetdaksü.

"Asenoki iba rara m a m a d o k t s ü l a , sarasademtsüla aser alima tesem balala nung timtemertem atema inyaksüla. Kechiyong rara ajakji kibong ka nung tanur ka shirangba ama lir. Parnoki kasa temeim nungdaker," ta parnokisa ayongzüker.

Parnokisa UK sorkar aser alima linüktem dang Sudan nung tangsa rara anentsü aser tetsükdaksü kecha makai timtemertem nem teyari agütsütetsüsa inyaksüla, ta mepishia metetdaksü.

ANOGO ABEN TSÜNGREM DEN

Tsüngrem asü rongsen?

"Sen meimbaji tamajung ajak tera... Tsüngrem nisung iba nungi jena oang" (1 Tim. 6:10-11)

Asangur nisung kati Yisu dang asüküma pa lanuwa nungi ozüng ajak benshia aruogo ta ashi, aser pai iba asangur matoksaba ashir: "Nai tabensaba kümnera, oang, na akaba ajak yokang aser sensaker nem lema agujang, aser arung, kü sülen anitakang" (Mt. 19: 20-21). Saka asangurji jashir oadak.

Tanü sen nung lendong aketba kanga ajema sayur. Yisui iba indang yimjak nung mapang shia ashi. Tenyar Yohani ashi: "Nenoki alima mesüra alima nung aliba osettem temeim, kari alima meimra, tebu temeim pa dak mali " (1 Yn. 2:15). Asenoki kasa mapang nung Tsüngrem aser Hon meimtsü makok. Tatem anogo nung timtem arutsü ashiba nung Pauli 'Tsüngrem dang nungi Pei tali meimba" aser "sen meimba" mezüngbuba jenjang nung ashi (2 Tim 3:1,2). Asenoki ka meimtsü aser ka sempatsü (Mt. 6:24).

Takar akümstsü jangrabaji yimya. Saka asenoki idakji terasaba aliba metettsü tenüngdaksü (A. Shin 23:4). Temulung asüba den temeshibaji tajangzük tulu. Kechiaser asenoki ibalima yagi kecha bener maru aser iba lima nungi kecha bener maotsü. Asenok chiyungtsü aser aben süoshi lira idakji temulung süa lidi. (1 Tim. 6:6-8). John Wesley-i ashir : "Alima nung rongsen rizüngtsübaji nüktapangta aser nisung tepseter mapa nokdangba ama nokdang. Sen meimba jagi asen taküm rajang kümdaksür aser tejang matanger (Lk 8: 14)." Asen nungdakba dang talilaji nungdakba pur nem agutsüsüla.

March-April nung India nung Khristantem anema inyakba aika liasü

May 05, 2024: Taküm March aser April ita na nung India nung Khristantem anema inyakba tatalokba aika liasü, tekülem sentong tagidak mapang nung timtem agütsü,

state aika nung Khristantem anema ken o benok, aser ibaji ajanga alima nung democracy linük tulutiba nung yimsü temeden jenjang sayur, ta persecution watchdog organisation balalai metetdaksü.

Hindu nationalist telok balalai Khristantem tekülem ki amak aser lenirtemi kangshia tamangba yimsü meyipdaksür ta tai tongloktsüba aika liasü. Police-i pastor aser tekülemertem aika apu saka aika chiokogo, ta parnoki metetdaksü.

Uttar Pradesh state kija nunga Unnao, Kaushambi, Gorakhpur, Jaunpur, Raebareli, Saharanpur, Maharajganj aser Kanpur nung Khristantem anema inyakba tatalokbatem liasü.

April 1 nü police-i Unnao nung pastor ka jaoka asüngdangyaba sülen chiok. Kaushambi nung Hindu teloktemi tekülem sentong

nung timtem agütsüba sülen Khristan 8 apu aser Uttar Pradesh nung anti-conversion ozüng kübok parnok anema ken o benok.

Madhya Pradesh aser Chhattisgarh na nunga Khristantem anema ken o aika benok. Madhya Pradesh nung Khristantemi Supreme Court ajurua sarasadem sentongtem agitsü temelaba meshia liasü, kechiyong ketdangsertemi tensa azüoktsü atema tenokdangba agütsür liasü.

Chhattisgarh kübok Durg district nung Pastor Dhalsingh Sahu apuba sülen mapang tatsüka tsüngda chiok, Dhamtari district nung lokti kati Tenla kidang timtem agütsü, Tenla kidang osettsüset raksatsü aser Arogo züngsemtem dak azük.

Tesem aika nung Arogo kiojentem raksatsü. Uttar Pradesh kübok Maharajganj nung mejangjaba nisungtemi March 28 nü Tenla ki telungi tua menden, sabang, Laishiba aser sound systems raksatsü aser March 26 nü Raebareli kübok yimtsüng ka nung pastor kati Holi mamongba atema lokti kati pastor dak azük.

AO OSHI ANGAZÜKDAK:
TANÜ ANGAZÜKTSÜBA OJANG



Süngmetak

(n) Süng asudang mesüra alepdang tilaka pakzüka aluba (chips of wood)

* Süng temerang asudang süngmetak kanga alur.

Süngmok

(n) ali telonglen manü ama aienba aonmenemtsü (ginger)

* Süngmok jenjang tasak kümogo.

OLONG PAITEP # 6778

1			2		3		4		5
6		7							
					8				
9				10					
						11			
			12						13
	14							15	
					16				
			17						
								18	
19									

TIPIEN

- 2. Teburtemi tejak nung awaba
- 6. T ___ em
- 8. Tzüak ayudak
- 9. Nüngdakba dang timba
- 11. Züina ao
- 12. Yangi tzü angur
- 14. Tangar dang nungi tali
- 16. Senyong masü
- 17. Oadokdi
- 18. Tzü tarok
- 19. Yimtaklir aikati iba ya ki den külemi yanglusemer

LANGTSÜNGLEN

- 1. Temejangdak
- 3. Nisung ka mapa inyaksü nübo
- 4. Azüntsü asoshi mejemba
- 5. Tesangwa agütsüba
- 7. Tila masü
- 10. Tebenjem tetsür chanu
- 11. Tekolak nung inok
- 12. Tetsüngda
- 13. Tangar inyakba ka inyak
- 14. Tim masü ta ashi
- 15. Asalendong
- 16. Tanü dangtsü

OLONG PAITEP # 6777 TELANGZÜBA

TIPIEN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti,
- 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Tenükjang, 2. Luden,
- 3. Kioktsü, 5. Lenti,
- 7. Tajangzüak, 11. Teronem,
- 12. Sempa, 13. Jahaz.

NAI-A YA METETTER MA

Arunachal Pradesh tsür Rupa Bayor India tenüng nungi 8buba Asian Taekwondo P o o m s a e Championship nung asayatsü renema lir. Iba asayamung ya Vietnam nung May 14 aser 15 nü asayatsü. Bayor ya tang Asia nung 4buba aser alima



ajunga nung 13buba jenjang nung lir. Asian championship ya World Taekwondo-i sanction asüba G4 ranking event ka lir. Bayor tang Indo-Korean Taekwondo Academy, Mumbai nung international coach Abhishek Dubey tawabangba kübok training agidar. Bayor-i World Taekwondo-i sanction asüba asayamung balala nung medal aika ngua lir aser tesüsa lai Turkey nung 2023 WT President Cup-Europe (G2), senior individual poomsae category nung gold medal ngua liasü.

Assam: Meghalaya den arrtsü nung police patrol post ka rongtoktsü



Mejangjaba nisungtemi Assam aser Meghalaya na arrtsü nung West Karbi Anglong district kübok khen atema yanglua aliba police patrolling post ka Honibar aonung rongtoktsüba noksa angur.

Guwahati, Monupii/May 5 (Agencies): Mejangjaba nisungtemi Assam aser Meghalaya na arrtsü nung West Karbi Anglong district kübok khen atema yanglua aliba police patrolling post ka Honibar aonung rongtoktsüogo.

Osang ajang ashiba agi, mi senoktsüba mapang Chirilangso, Tapat kübok iba police patrolling post nung

sepai ka danga maliasü. Iba tatalokba ajanga iba tesem nung alirtem mesüngjemteti liasü. Meghalaya nung Khasi nung aser Assam nung Karbi nung tsüngda mangatettep adoker aliba mapang ka nung iba police patrol post ya amenokja liasü.

"Lendong atalokba sülen security team ka iba tesemi

aritepa ao, ajisüaka post rongtokatoker liasü," ta ketdangsür kati ashi. Source-i ashiba agi, iba tesem nung kidanger state ana nung aliba nüburtem tsüngda taoba mapang mangatettep adoka liasü.

"Iba lendong atalokba sülen iba tesem nung security akangshitsüogo," ta police ketdangsür kati ashi.

Assam nung phensedyl bottle 10,000 dak tema apu

Pathala, Monupii/May 5 (Agencies): Assam nung biscuit bena aliba gari ka nung meima phensedyl cough syrup shibelena aliba Assam kübok Bajali Police-i nokdangogo.

Sen lakh 70 shi alang phensedyl cough syrup bottles 10,000 dak tema Assam nung Bajali district kübok NH-27 nung Bhawanipur toll gate nung tata gari ka nung bener lia pua liasü.

Bajali district indang ASP,

Tinayan Bhuyan-i ashiba agi, osang tejangja ka angazükba sülen ketdangsürtemi toll gate anasa meita aoba sentong ka ayongzüka liasü.

Police temi gari sota bushiba mapang phensedyl bottle tem ya Britannia biscuit carton tem bena aliba kübok gari (registration number UP 21 CN 5610) nung takdang balaka yanglur meima bener liasü. Iba gari ya Uttar Pradesh nungi aruba liasü.

"Bushisüngdangba sülen Britannia biscuit boxe tem kübok gari nung takdang balaka yanglur phensedyl bottle 10,000 bener liasü," ta Bhuyan-i ashi.

"Ken o dak sendakba nung Uttarakhand kübok Sultanpur nungi Saleem'er jabaso Faeem puogo," ta paisa metetdaksü.

Maneni Bhuyan-i ashiba agi, ken o tejangjaba metettsü atema temzüng ozüng dak ajemdaker bushisüngdang tenzüko.

Tripura police-i Dhalai district nung Bangladesh nunger 16 apu

Agartala, Monupii/May 5 (Agencies): Tripura Police-i Dhalai district nung tatalokba balala ana nung tanur pongu densema Bangladeshi nunger 16 puogo.

Itangiter osang dak ajemdaer Gandacherra Police Station nungi sepaitemi Mas Kumbhir Para meita ao aser tanur asem densema Bangladesh nunger 11 pua liasü.

Police temi parnok ket nungi ticket, Bangladeshi Covid

vaccination kuli kaket aser Bangladesh indang sen nguteta liasü.

Ken o ashishiba sülen parnok ya mapa bushitsü atema küm asem tejakdang Bangladesh nungi West Bengal ajanga India-i aitba nguteta liasü.

Küm ishika sülen parnok Bangladeshi-i meyipa aotsü atema Gandacherra tonga liasü. Ajisüaka parnok arrtsü maden tsüngda police temi pua liasü.

Pua alirtem rongnung Md. Mamun Sardhar (29), Ruma Begam (25), Afsana Akter (22) nunger densema liasü.

Tanga tatalokba ka nung Tripura Police aser Government Railway Police na longjemer meita aoba mapang Ambassa Railway Station nung tanur ana densema Bangladesh nunger pongu puogo. Osang ajanga ashiba agi parnok ya West Bengal-i oya aliba mapang pua liasü.

Manipur: nung sen crore 2.35 alang temesepba mozü apu



Imphal, Monupii/May 5 (Agencies): Manipur nung Imphal Branch Customs Division Anti-Smuggling Unit-i, international black market nung sen crore 2.35 alang temesepba mozü Guwahati-i

oya aliba gari ka nung Honibarnü puogo, ta ketdangsürtemi Deobarnü metetdaksü.

Osang tejangja ka angazükba sülen anti-smuggling officers team kati

Imphal nungi km 5 shi pilar Mantripukhri anasa National Highway 102 nung temulung meleme bilemba gari ka Honibar anepdang 7:30 ako shi nung sota liasü.

Bushisüngdangba mapang passenger ka ket nung plastic bag tilala 40 nung Brown Sugar gram 470 bener aliba nguteta liasü, koba international shishilembadak sen crore 2.35 alang asütsü.

Ken o maneni bushisüngdanga aotsü atema aija alisang tenüng tang tashi mesangdongi lir, ta ketdangsürtemi ashi. Aija alisang ya NDPS Act of 1985 dak ajemdaker aitsüogo.

Panama tir atema nisung ti tokteper

Panama City, Monupii/May 05 (Agencies): Panama nung tir aser ozüing yanglur noklang aika shimtsü asoshi general election agitar.

Hopta aika nübuyimba sülen voters million asem dak temi candidates ti rongnungi Panama tir shimtsü, shibai rongsenketzüing tebilemsü, ochimashi aser 'investment haven' tenüing tanaben bener arutsü asoshi inyaksü nüngdaker.

Party ka kijai legislature amokbangtsü metakzüteter, kong menden 885 asoshi tokteper. Voting ya Deobarnep 7:00 ako nung lapokogo aser ghonda ti sülen shibangtsü.

2009 nungi 2014 tashi tir inyaksang Ricardo Martinelli ochimashi ken o nung tai

tongloktsüba sülen election nung shilem magitsü tenokdangba agüja lir aser opinion polls nung taoba minister Jose Raul Mulino jenjang tajungba sayur.

Iba tetoktepeba nung Martinelli-i timba amokbanger aru aser pa indang running mate Mulino asoshi Nicaraguan embassy telung nungi nübu yimja liasü, shiba political asylum anguba sülen yangji February 8 nü nungi jenoka alir.

Mulino ya taoba tir den tesendaktep aliba sayua aru aser "Martinelli Mulino 2024" korang masem kangabo mangu aser pa shimtetra Martinelli yaritsü nangzük. Paisa Martinelli mapang ama rongsenketzüing asendenshitsü

nangzüka lir.

Tir asoshi tokteper rongnung Romulo Roux ya tanabuba jenjang nung lir aser taoba tir Martin Torrijos-a jenjang tanabuba aser tasembuba nung melentepa angur. Iba sülen Ricardo Lombana lir aser tang Vice President Jose Gabriel Carrizo dena lir.

Panama indang election ozüing nung election tanaben agishitsü menüingdaker, anungji Deobarnü agiba ya tatem asütsü. Voting ketdangtsü aser election timi agitetsü asoshi volunteers tem yoktsü ta telok balalai ashi.

Iba tetoktepeba nung takok angur ya linük tekolakba aser ato kilonser inyaksü aser July 1 nü mapa agizüktsü.

Anentsüh aser tzümetsüing agi Brazil nung nisung aika asü



Brasilia, Monupii/May 05 (Agencies): Brazil south tsütsü anogo aika tzüinglu kanga sashia aruba ajanga tzümetsüing tulu adoka aser anentsüh aluba ajanga nisung 55 süogo, ta ketdangtsürtemi ashi.

Rio Grande do Sul nung ano nisung 74 samar bushir ta ketdangtsürtemi ashir.

Taoba Honibarnü yipru tenzükba sülen nisung 25,000 jungnüa pei ki yutsür tesem balala nung jenoka lir.

Nisung million tesadang ka power aser tajemtsü tzü temürek mali timtemtar aser tzüinglu maneni arutsü imlar.

Rio Grande do Sul indang civil defence ajanga ashiba agi, tzümetsüing dak sendakba nung nisung 55 asüba jangjaogo aser ano nisung tenet asüba indang bushisüingdang sütar ta ashi.

Tzüngsang tali atsükba, humidity tali akumba aser mopung sashia aonba ajanga tzüingsang mopung balaka akum.

Iba state nung yimti 497 aliba nungi timba iba yipru ajanga kongshia tesem aika nung lenmang aser apu raksatsür lir.

Yipru ajanga Bento

Gonçalves yimti anasa anentsüh alua hydroelectric dam ka lao aser nisung 30 asü.

Kasa tesem nungsa tzü onsara akumba ajanga tzünokdang tanabuba teraksar lir, ta ketdangtsürtemi ashi.

Porto Alegre nung Guaiba ayong nungi tzü muteta adoka yimtung aser kiyong aika mubanga liasü.

Porto Alegre indang international airport nung tayimtsü ajak mapang telatet makai anena lir.

Iba tesem nung alir kati item teraksa ya ngur temulung shiranger ta ashi.

Brazil Tir Luiz Inacio Lula da Silva-i iba region ya semdangogo aser central sorkar nungi teyari agütsütsü nangzük.

Ajisüaka tzüingsang mopung takzür temi iba region nung tzüinglu ano maneni arutsü ta ashir.

Taoba küm Rio Grande do Sul nung cyclone ka arua nisung 30 dak tema takum samatsü.

El Nino tzüingsang mopung ajanga tzüinglu tali arudaktsür, ta Brazil indang National Institute of Meteorology ajanga ashir.

Burkina Faso-i bendanger media kar nem tenokdangba agütsü

Ouagadougou, Monupii/May 05 (Agencies): Army-i civilian 223 tepset ta osang prokshiba sülen Burkina Faso-i ano bendanger media outlets ishika nem tenokdangba agütsüogo.

US nung amendaker aliba Human Rights Watch (HRW)-i ashiba agi, yimdaklirtemi agütsüba atema February ita item nisungtem ya tepset asütsü ta amanger.

Ajisüaka Burkina Faso sorkari iba taitüsüba ya magizük.

HRW dak sendakba nung osang agütsüba atema parnokki BBC aser US broadcaster Voice of America na nembo tenokdangba agütsür lir.

Burkina Faso ya military-i yimsü asür. Islamist telungpurtem samatsütsü ta tenangzükba agütsür 2022 küm military-i sorkar atsünga liasü.

Ajisüaka tensa tamajungba kümogo aser Burkina Faso

asemsübo jihadist teloktemi amokbanger lir.

Burkina Faso indang communications regulator-i ashiba agi, French network TV5Monde nema hopta ana atema tenokdangba agütsütsü aser parnok indang website mamshidaktsütsü, ta state meyong media sangdong ka ajanga metetdaksü.

German broadcaster Deutsche Welle, French newspapers Le Monde aser Ouest-France, British newspaper the Guardian, aser African agencies APA aser Ecofin indang website tema osang tejangja ka magütsü tashi nokdangogo.

Item media outlet tem nung Burkina Faso indang military-i Soro nung nisung 179 aser Nondin nung nisung 44 tepset ta sangdonga liasü.

Parnokisa, küm ter tsüingda army-i HRW dak sendakba nung jenjang tamajungtiba

agibaji iba ya asütsü ta ashi.

Honibarnü Burkina Faso indang Communications Minister Rimtalba Jean Emmanuel Ouedraogo-i ashiba agi, "tamendakdak maka taitüsüba agütsüba ya Burkina Faso sorkari khenyongi magizüker."

Minister-isa, iba tatalokba kuli tejangja aser shirnoki lendong bener arutsü, iba indang bushisüingdanga aliba mapang HRW-i kuli tejangja makai parnokki mulungka nung osang prokshiba ya tebangkatsüka lir, ta ashi.

European Union aser UN na densema International and human rights teloktemi Islamists tem den raraba mapang meimchir temeden anema inyaksangshiba atema Burkina Faso aitsüogo.

Kasa mapang nung Brehostibarnü Burkina Faso indang media regulator-i, iba osang ya meperokshitsü atema tekümdangtsü metetdaksüogo.

Hamas-i akhangba Israel-i magizüktsü: PM Netanyahu



Cairo, Monupii/May 05 (Agencies): Israel-i Gaza amakba anentsü aser iba melena Hamas-i October 7 nü pua bener aortem chioktsü atema tetsüingtai ia jembishinü tenzükshio.

Hamas-i aginüba ama rara ya teti asoshi anentsü asü masü, ta asüba ken o tongtipang süa jembir amai angashir.

Ajisüaka Deobarnü Israel Ato Kilonser Benjamin Netanyahu-ibo Hamas-i akhangba magizüktsü ta ashi.

Iba tezüngzükteper yagi Gaza ya Hamas kübok alitsü, anungji Israel asoshi lendong lir, ta pai ashi.

Anogo 40 atema rara anena

atatsü aser Hamas-i pua alirtem chioktsü aser Israel nunger jail nung Palestine nunger aika puoka aliba chioktsü indang jembir.

Tang tesüsa benokba proposal onoki süoki ia repranger, ta Hamas lenir Ismail Haniyeh indang adviser kati ashi.

Ajisüaka pai tezüngzükteper kechi agidir agiaka Israel nunger Gaza nungi ainshitsü aser rara jungjunga anentsü dena alitsüla, ta pai takhangba nenshia ashi.

Deobarnü Netanyahu-i jembidang "Hamas battalions bunkers nungi adoka ano Gaza amokbangtsü, par mitkar ki o jen

tanaben yanglushitsü, aser temetek nung, south tsütsü aser linük tesem ajungalen Israel senso amokmerentsüsa tensa onoki magizüktsü renema lir," ta ashi.

"Hamas-i akhangba nung Israel-i memulungtsü," ta pai ashi.

Ozü senso pua aliba chioktsü mechi rara anentsü onoki kecha tensa nunga memulungtsü, ta Israel sorkar kati Honibarnü shia liasü.

"Ozü nüburtem pua aliba chioktsü asoshi khen atema rara anenang-tanen, IDF tem Rafah-i aitsü aser yangji tanüingba Hamas battalions samatsütsü," ta parnokki ashi.

Far-right coalition ajanga Netanyahu dang mapang talangka nungi nangzüka aliba ama Gaza south tsütsü Rafah yimti amaktsü akjanger, kong nisung million 1.4 shi Gaza tesem balala nungi jenoka lir.

Israel yimten aser mitkar tsütsü tembar tulutiba, US-i iba sentong memulunger, kechiaser iba yimti ya amakba ajanga civilian aika takum samatsü, aser parnokki Palestine nunger tesem

balala nung prokshia alir kumzüka ayutsü atema ang sentong mezüing yanglutsü ajungshir.

Yimjung atema ken o jembiba nung tongtipangtiba onükji ceasefire ya khen atema asü teti atema alitsü.

Pei kidanga Israel sorkar ya ajem-ajema meliteter, kong Honibar aonunga Israel nunger meyerijang aika adenshia Hamas-i pua aliba chioktsü asoshi tezüngzükteper ka yanglutsü akhang.

Tel Aviv nung longkak aiter temi "rara ya temeshi masü, takum ya temeshi," ta ayimtena liasü aser kari Gaza nung rara atsülangtsü Netanyahu indang nükjidong lir ta aitsü.

Pua alirtem anizüktsü asoshi linük nung Netanyahu nem takhangba agütsüba rongnung Honibarnü longkak aita ya ka lir.

October 7 nü Hamas teloki pua bener aor nisung 252 nungi nisung 128 tia memetet aser parnokki rongnunga nisung 34 bi süir südi ta bilemer.

Ceasefire ken o ya ita aika jembia arur saka teletmetba

tajung kati maruteter aser November ita atemba sülen rara anenba aser pua alirtem chiokba mali.

Hamas züingsemtem Gaza arütsü alema Israel telungi October 7 nü yia nisung 1,200 shi tepseter nisung 250 dak tema pua bener aoba sülen Gaza nung rara ya tenzük. Iba telok ya anüolen linük aikati kiralongrar telok ta züingshir.

Iba sülen Israel mitkari Gaza nung tesem balala amakdang Palestine nunger 34,600 dak tema tepsetogo aser 77,900 dak tema yirutsüogo, ta Hamas meyong health ministry ajanga ashir.

Honibarnü Hamas lenir kati ashiba agi, Gaza nung rara jungjunga manentsüsa tezüngzükteper kecha magizüktsü aser Israel lenir Benjamin Netanyahu-i iba tezüngzükteper nung tetsükdaktsü agütsür.

Honibarnüa Qatari, Egyptian aser US mediators temi Cairo nung Hamas delegation ka ajurua liasü. Iba rara tenzükter ita tenet ajunger aser alima tesem balala nung iba rara mechi longkak ait tenzükogo.

Youngstars CC-i Silver Cup 1buba Super Six tournament kokogo



Kohima, Monupii/May 5 (TYO): Nepali Baptist Church Kohima Youth Department (NBCK YD)-i ayongzükba Silver Cup mezüngbuba Super Six Tournament Youngstars Cricket Club-i kokogo. Iba asayamung ya Razhükhrie GHSS Ground nung "Peacer and Unity through Cricket" omen nung ajemdaker asaya liasü.

Honibarnü final asaya nung Youngstars CC-i Fire Balls koka liasü.

Toss koka mezüng field asütsü shimba sülen Youngstars CC puri Fire Balls pur nem run 61 dang yangludaktsü aser wicket pezü anunga lia run ya menepa parnok asaya koka liasü, ta organising committee secretary Radhika Chetri-i metetdaktsü.

Asayamung akokba Youngstars team nem senpet sen 20,000 den takok marok aser kuli kakat agütsür aser

runners-up Fire Balls tem nem senpet sen 10,000 den kuli kakat agüja liasü.

Jurila sempet agüzükertem: Highest Run - Kaif Ahmed, Youngstars CC (115 runs); Best Bowler - Rehan (Fire Balls) asaya 4 nung wicket 7; Player of the Tournament - Rupam (Fire Balls) run 104 & wicket 2. Parnok ajak nem senpet sen 1000 aser kuli kakat agüja liasü.

Asayamung shibangba sentong nung alakteta jaoker Commissioner & Secretary to the Government of Nagaland (Industries & Commerce), Kekhrievor Kevichusa-i takok anurtem nem sempet agüja liasü.

Asayamung ayongertem ajungmesoa pai, Super Six limited overs asaya ka, kong asayar kati danga temelenshi bener arutsütetsü aser asayar kati pei sempet kangajungabo mangatetsü akok, ta ashi.

Asayar kati pei sempet ya

20 mesüra 30 overs format nungang tajungba amshitetsü akok, ta Kevichusa-i ashi, shiba taoba mapang cricket asayar ka liasü. Paisa, NBCK YD-i T20 asayamung danga ayongzüktsü atema inyaktsü timla aliba lemsatapa liasü.

Paisa, asayartem dang yimya tajung bentshia bendanga agüja meranga inyaka asaya ya profession ka ama agitsü ajungshi.

Asayamung shibangba sentong ya Beenita Karki lenisüba nung agi aser John Thakuri-i sarasadema liasü. Sentong nungsa organizing committee züngsem Rahul Siwa-i tepela o jembi aser Youth Director Anup Kausal-i tatem sarasadem sarasadema den Karisma Rasaily-i ken tajung ka tena liasü.

Iba asayamung ya May 2 nü tenzük aser ajak senteper team 13-i shilem agia liasü, ta Chetri-isa metetdaktsü.

I-League asayartem India team nungi asayatsü maogka agütsüogogo

Kolkata, Monupii/May 5 (Agencies): India football team coach Igor Stimac-i, I-League nungi asayar tajungtem nem national team squad nung züngoksemtsü atema maogka agütsüogogo.

Honibarnü head coach-i, June ita World Cup qualifiers atema asayartem sangdongba mapang I-League nungia asaya pezü densema liasü, aser parnok pezü rongnung asembo Mizoram nungi lir.

I-League nungi asayartem rongnung Mohammedan SC indang Indian top scorer David Lalhlansanga, Aizawl FC striker Lalrinzuala Lalbiaknia, Inter Kashi midfielder Edmund Lalrindika aser Real Kashmir defender Muhammad Hammad nung densema lir aser parnok Hokolbarnü nungi tenzüka Bhubaneswar nung hopta

pezü agitsü aliba camp atema jaokogo.

Taoba Aizawl FC forward Lalhlansanga, shibai Mohammedan nem teyari tulu agüja liasü, pai I-Leagur akokba team nungi 22 ben asayaba mapang goal pongu idaktsü aser assist ana süja liasü.

Kasa mapang nung Lalrinzuala-i otsü tasen ka yanglua I-League nung India nung rongnung goal timtiba idaktsüba asayar kümogogo. Pai taoba season goal 15 idaktsü aser Sunil Chhetri aser Mohammed Rafi nati yanglur aliba record ajateta liasü.

Maneni arishi küm 25 tain playmaker Lalrindika-ia Inter Kashi atema tongtibang shilem agia pai goal pezü idaktsü aser assist ti süja liasü.

Defender tejen Sandesh Jhingan yiruba ajanga

masayatetsüsa akümba sülen Real Kashmir centre-back Hummad-i pa melentsü akok. Camp atema shimba asayartem:

Goalkeepers: Amrinder Singh, Gurpreet Singh Sandhu; Defenders: Amey Ganesh Ranawade, Jay Gupta, Lalchungnunga, Muhammad Hammad, Narendra, Nikhil Poojary, Roshan Singh Naorem; Midfielders: Brandon Fernandes, Edmund Lalrindika, Imran Khan, Isak Vanlalruatfela, Jeakson Singh Thounaojam, Mahesh Singh Naorem, Mohammad Yasir, Nandhakumar Sekar, Rahul Kannoly Praveen, Suresh Singh Wangjam, Vibin Mohanan; Forwards: David Lalhlansanga, Jithin Madathil Subran, Lalrinzuala, Parthib Sundar Gogoi, Rahim Ali, Sunil Chhetri.

ICC Women's T20 World Cup atema mapanglem sangdongogo

Monupii/May 5, 2024 (Agencies): ICC Women's T20 World Cup 2024 Bangladesh nung October ita asayatsü, aser India o Pakistan na October 6 nü Sylhet nung asayatsü jangjaogo.

Iba asayamung nung alima nung team tajungtibatem toktepa angutsü, kong iba asayamung trokben koker aliba Australia team-a densema lir, shirnok mezüngbuba asaya qualifier ka den asayatsü.

Iba asayamung atema telok aser fixture Deobarnü (May 5) sangdongogo.

Australia team-i taoba küm Cape Town nung iba asayamung tesüsabuba koker lir aser parnok Group A nung ata lir. Parnok 2020 runners-up India, New Zealand, Pakistan, aser qualifying team ka den asayatsü.

Group B nung South Africa, England, 2016 champions West Indies, asayamung ayongzükba asayaba linük Bangladesh, aser tanabuba qualifier densema lir. Asayamung ya

Dhaka aser Sylhet nung anogo 19 asayatsü kong asaya 23 densema.

Group A: Australia, India, New Zealand, Pakistan, Qualifier 1

Group B: South Africa, England, West Indies, Bangladesh, Qualifier 2

Team tem group asaya pezüzi asayatsü aser iba sülen telok anaprongla nungi temaba jenjang nung tembangba team ana semi-finals-i aitsü, koba October 17 aser 18 nü asayatsü.

Final asaya ya October 20 nü Dhaka nung asayatsü. Kasa mapang nung semi-final aser final asayatem atakzükba aliba anogo masayatetsüsa kümra asaya asayashitsü atema reserve anogo mekazükba yuogo.

India aser Pakistan na asayatsü aliba asaya dak alia asaya tongtibangtem rongnung England aser South Africa na October 3 nü Dhaka nung asayatsü aliba asaya densema lir. Maneni Australia aser New Zealand nata October 11 nü Sylhet nung asayatsü.

Swiatek-i Madrid Open final nung Sabalenka kokogo

Monupii/May 5, 2024 (Agencies): Madrid Open tetsür kija asaya final nung world No. 1 asayar Iga Swiatek-i Aryna Sabalenka koka, taoba küm Madrid final nung tamakok anguba küpzükogogo. Tena tsüngda final ghonda asem ser minute 11 asaya liasü.

Decider nung 1-3 agi tesülen aliba den match points asem tashi kümzükba sülen Swiatek-i iba asaya ya 7-5, 4-6, 7-6 (9/7) agi koka tang mezüngbuba Madrid Open kokogo.

Swiatek, shibai lai indang carer nung title 20buba aser WTA 1000 level asayamung tekububa kokogo, lai taoba asayamung tibuba final atonga kokogo aser Elena Rybakina den külemi taküm asaya 30 akokba asayar kümogogo.

Mezüngbuba set nung asaya anapronglai kati ka indang serve break sütepa asaya saka Swiatek-i Sabalenka indang serve ka break süa la 6-5 agi tejakdang aküm aser asaya koka liasü.

Tanabuba set nung 2-0 agi tesülen liaka Sabalenka-i game 10buba nung Swiatek indang

serve ka break süa lai asaya akok aser iba ajanga decider asayatsü aküm.

Decider nung Sabalenka-i Swiatek indang serve ka break süa la 3-1 agi tejakdang aküm, ajisüaka asaya atur 5-6 aliba mapang Swiatek-i la indang serve nung match point ana kümzük aser lai tanungba asaya ana atonga koka iba asayamung kokogo.

"Final asaya aruba rongnung iba final ya balaka liasü," ta Swiatek-i asaya tembangba sülen ashi.

Tamakok nguaka Sabalenka-i, lai January ita Australian Open akokba mapang asayatetba ama tanaben asayatetogogo ta bilemba lemsatapa liasü.

World No.2 asayar yagi Melbourne nung asayaba sülen la asayaba jenjang tamajungba akümba nangzükogogo, saka Madrid nung set asemsem aiba asayaba ajanga la tajungba küm daktsüogogo ta bilemer.

Maneni lai, tamakok anguba agizüktsü tasak saka temaba jenjang nung aliba asayar Rybakina aser Swiatek na den toktepa asayatetba atema kanga pelar, ta ashi.

BILEMDANGANG

"Nü mapa agi tangar ajungmesora tajungba inyaktsü merangang."